

PRAVILNIK
O NAKNADI PLAĆE ZA VRIJEME PRIVREMENE
SPRIJEČENOSTI ZA RAD NA TERET SREDSTAVA ZAVODA
ZDRAVSTVENOG OSIGURANJA KANTONA SARAJEVO*

("Službene novine KS", broj 42/24)

POGLAVLJE I - OSNOVNA ODREDBA

Član 1.

(Predmet)

Ovim Pravilnikom se bliže utvrđuju uslovi, način i postupak ostvarivanja prava na naknadu plaće za vrijeme privremene spriječenosti za rad zbog bolesti ili povrede, visina naknade i valorizacija osnovice.

POGLAVLJE II - USLOVI, NAČIN I POSTUPAK OSTVARIVANJA PRAVA NA NAKNADU PLAĆE
ZA VRIJEME PRIVREMENE SPRIJEČENOSTI ZA RAD ZBOG BOLESTI ILI POVREDE, VISINA
NAKNADE I VALORIZACIJA OSNOVICE

Član 2.

(Pravo na naknadu)

Pravo na naknadu plaće za vrijeme privremene spriječenosti ostvaruje se ukoliko je privremena spriječenost za rad utvrđena pod uslovima i na način utvrđen Zakonom i važećim Pravilnikom o postupku i kriterijima za utvrđivanje privremene spriječenosti za rad osiguranika i odredbama ovog Pravilnika.

Član 3.

(Osnovica za naknadu)

(1) Osnovicu za naknadu plaće čini plaća isplaćena osiguraniku, umanjena za zakonom propisane doprinose iz osnovice, a koja je isplaćena osiguraniku u mjesecu koji je prethodio mjesecu u kojem je nastupila privremena spriječenost za rad.

(2) Osnovica za povrat naknade za osiguranika koji je istovremeno i obveznik uplate doprinosa (samostalna djelatnost) je osnovica na koju je obračunavao i uplaćivao doprinos za obavezna osiguranja, umanjena za zakonom propisane doprinose iz osnovice. Osnovice za obračun doprinosa određenih obveznika za svaku godinu propisuje federalni ministar finansija.

(3) Ako u mjesecu koji prethodi mjesecu u kojem je nastupio slučaj na osnovu koga osiguranik stiče pravo na naknadu osiguranik nije ostvario plaću, kao osnovica za naknadu uzima se prosječna plaća na nivou kantona za odgovarajući mjesec.

Član 4.

(Valorizacija osnovice za naknadu plaće)

(1) Utvrđena osnovica iz člana 3. ovog Pravilnika se valorizira ako je osiguranik duže od tri mjeseca neprekidno spriječen za rad i ako je prosječna plaća radnika kod pravne ili fizičke osobe kod koje je osiguranik zaposlen, porasla za više od 5%.

(2) U slučaju iz stava (1) ovog člana, valorizirana naknada plaće pripada osiguraniku od prvog dana idućeg mjeseca po isteku tri mjeseca neprekidnog korištenja naknade plaće, ako je ispunjen uslov za povećanje naknade.

(3) Valorizacija u skladu sa stavom 1. ovog člana vrši se tako što se plaća koju je osiguranik ostvario u mjesecu koji je prethodio mjesecu u kojem je nastupila privremena spriječenost za rad usklađuje sa kretanjem prosječne neto plaće svih zaposlenih kod poslodavca i dovodi na nivo plaća za mjesec za koji se isplaćuje naknada

* Pravilnik je objavljen u "Službenim novinama KS", broj 42/24 od 24. oktobra 2024. godine, a stupio je na snagu 1. novembra 2024. godine.

Stupanjem na snagu ovog pravilnika, prestaje primjena Pravilnika na strani 432 Priručnika o porezima za 2024. godinu.

Pravilnik o naknadi plaće za vrijeme privremene spriječenosti za rad na teret sredstava Zavoda zdravstvenog osiguranja KS

i od tako povećane osnovice ponovno određuje pripadajuća naknada plaće.

(4) Pokazatelj rasta plaća utvrđuje se kao neto satnice utvrđene kao količnik ukupne isplaćene neto plaće obveznika i ukupnih sati koji ulaze u obračun plaće na nivou obveznika uplate doprinosa, odnosno poslodavca.

(5) Ukoliko tako utvrđena prosječna plaća odnosno utvrđena satnica raste više od 5% izvršit će se usklađivanje naknade pod uslovima utvrđenim Zakonom i ovim Pravilnikom.

Član 6.

(Visina naknade plaće)

(1) Naknada plaće određuje se u visini od najmanje 80% osnovice za naknadu u slučajevima privremene spriječenosti za rad, kada ta naknada tereti sredstva obveznika uplate doprinosa, odnosno poslodavca, s tim da ne može biti niža od iznosa minimalne plaće važeće za mjesec za koji se utvrđuje naknada.

(2) Visinu naknade plaće iz stava (1) ovog člana utvrđuje poslodavac.

(3) Izuzetno od stava (1) ovog člana, naknada plaće iznosi 100% od osnovice za naknadu:

- a) za vrijeme privremene spriječenosti za rad zbog povrede na radu ili oboljenja od profesionalne bolesti,
- b) za vrijeme privremene spriječenosti za rad zbog bolesti i komplikacija prouzrokovanih trudnoćom i porođajem,
- c) za vrijeme privremene spriječenosti za rad zbog transplantacije živog tkiva i organa u korist druge osobe.

Član 7.

(Najviši iznos naknade plaće na teret sredstava Zavoda)

(1) Najviši iznos naknade plaće za vrijeme privremene spriječenosti za rad na teret sredstava Zavoda koji se refundira obvezniku uplate doprinosa, odnosno poslodavcu je 80% od plaće koja je isplaćena osiguraniku u mjesecu koji je prethodio mjesecu u kojem je nastupila privremena spriječenost za rad.

(2) Ukoliko osiguranik nije ostvario plaću u mjesecu koji prethodi mjesecu kada je nastupila privremena spriječenost za rad, a poslodavac ne uzme osnovicu iz člana 3. stav (3) ovog Pravilnika, Zavod će refundirati poslodavcu 80% od iznosa koji je isplatio radniku, a koji ne može biti niži od iznosa minimalne plaće važeće za mjesec za koji se utvrđuje naknada.

Član 8.

(Najniži iznos naknade plaće na teret sredstava Zavoda)

(1) Najniži iznos naknade plaće za vrijeme privremene spriječenosti za rad na teret sredstava Zavoda koji Zavod refundira obvezniku uplate doprinosa, odnosno poslodavcu je najniža neto plaća utvrđena Odlukom o iznosu najniže plaće koji donosi Vlada Federacije Bosne i Hercegovine, a ne više od iznosa koji je poslodavac isplatio osiguraniku u mjesecu koji prethodi mjesecu kada je nastupila privremena spriječenost za rad.

(2) Izuzetak od stava (1) ovog člana su plaće osiguranika čija osnovica definirana u članu 3. stav 2. ovog Pravilnika i kada je ista niža od najniže plaće iz stava (1) ovog člana.

Član 9.

(Uslovi za ostvarivanje prava na naknadu plaće na teret sredstava Zavoda)

(1) Pravno odnosno fizičko lice stiče pravo na refundaciju naknade plaće na teret sredstava Zavoda po osnovu privremene spriječenosti za rad, pod uslovom da nema dospjelih a neuplaćenih doprinosa za obavezno zdravstveno osiguranje za period za koji podnosi zahtjev.

(2) Izuzetno od stava (1) ovog člana su slučajevi kada obveznik uplate doprinosa, odnosno poslodavac zaključi sporazum o obročnom plaćanju odnosno odgođenom plaćanju dugovanja sa Poreznom upravom FBiH, u tom slučaju ostvaruje pravo na refundaciju naknade plaće.

Član 10.

(Podnošenje zahtjeva za refundaciju naknade plate)

(1) Zahtjev za refundaciju isplaćene naknade plaće za vrijeme privremene spriječenosti za rad podnosi poslodavac Zavodu zdravstvenog osiguranja Kantona Sarajevo.

(2) Postupak obrade zahtjeva za povrat nakande plaće za vrijeme privremene spriječenosti za rad u poslovnica Zavoda uređuje se posebnim internim aktom koji će donijeti direktor Zavoda.

Član 11.

(Prilozi uz zahtjev za refundaciju naknade plaće)

Uz zahtjev za povrat naknade plaće, podnosilac je obavezan priložiti sljedeću dokumentaciju:

Pravilnik o naknadi plaće za vrijeme privremene spriječenosti za rad na teret sredstava Zavoda zdravstvenog osiguranja KS

- a) Izvještaj o privremenoj spriječenosti za rad izabranog (ovlaštenog) doktora medicine (doznaka za bolovanje), potpisanu i ovjerenu pečatom,
- b) Obrazac NPL-1 popunjen u tri primjerka, potpisan i ovjeren pečatom,
- c) Obrazac ZO-PL - Potvrda o isplaćenju neto plaći u koju se u određene rubrike unose podaci neto plaća za mjesec koji je prethodio utvrđivanju privremene spriječenosti za rad, potpisan i ovjeren pečatom,
- d) Platnu listu osiguranika (original ili ovjerenu fotokopiju koju ovjerava podnositelj zahtjeva), uz anonimiziranje svih podataka izuzev imena i prezimena osiguranika, bruto i neto plate, za mjesec koji je prethodio mjesecu u kojem je nastupila privremena spriječenost za rad osiguranika,
- e) Platnu listu osiguranika (original ili ovjerenu fotokopiju koju ovjerava podnositelj zahtjeva), uz anonimiziranje svih podataka izuzev imena i prezimena osiguranika, bruto i neto plaće, za mjesec za koji se traži refundacija naknade plaće,
- f) Ukoliko je osiguranik izoliran kao kliconoša ili zbog pojave zaraze treba priložiti Rješenje nadležnog inspektorata ili organa,
- g) Rješenje o invalidnosti ukoliko se radi o refundaciji naknade plaće nakon 7 dana (preduzeća za profesionalnu rehabilitaciju i zapošljavanje invalida, odnosno pravna ili fizička osoba, koja zapošljava osiguranika s invaliditetom),
- h) Izjavu samostalnog obveznika koji nema zaposlenih radnika, da za vrijeme trajanja privremene spriječenosti za rad ne obavlja registriranu djelatnost (ovjerena),
- i) U slučaju valorizacije osnovice za naknadu plaće: obračun valorizacije i dokaz o valorizaciji.

Član 12.

(Plaćanje refundacije naknade plaće)

(1) Refundaciju isplaćene naknade plaće Zavod će izvršiti u roku od 45 dana o dana podnošenja urednog zahtjeva.

(2) Pravo na refundaciju naknade plaće za vrijeme privremene spriječenosti za rad na teret sredstava Zavoda zastarijeva u skladu sa odredbama Zakona o obligacionim odnosima.

POGLAVLJE III – PRELAZNE I ZAVRŠNE ODREDBE

Član 13.

(Ostale odredbe postupka)

Ukoliko ovaj Pravilnik ne sadrži odredbe o postupku za refundacije naknade plaće na teret sredstava Zavoda shodno će se primjenjivati odgovarajuće odredbe zakona kojim je uređen upravni postupak.

Član 14.

(Prelazne odredbe)

Svi zahtjevi za povrat naknade plaće koji su zaprimljeni, a nisu okončani do dana stupanja na snagu ovog Pravilnika, kao i sve privremene spriječenosti za rad čiji je prvi dan privremene spriječenosti za rad utvrđen od strane izabranog doktora medicine prije stupanja na snagu ovog Pravilnika i za koje nije podnesen zahtjev za refundaciju naknade plaće na teret sredstava Zavoda od strane poslodavca, završit će se po odredbama propisa koji je bio na snazi do stupanja na snagu ovog Pravilnika.

Član 15.

(Prestanak važenja)

Stupanjem na snagu ovog Pravilnika prestaje da važi Pravilnik o naknadi plaće za vrijeme privremene spriječenosti za rad na teret sredstava Zavoda zdravstvenog osiguranja Kantona Sarajevo ("Službene novine Kantona Sarajevo", broj 25/20).

Član 16.

(Stupanje na snagu)

Ovaj Pravilnik objavit će se u "Službenim novinama Kantona Sarajevo" i na web stranici Zavoda, a stupa na snagu 01. novembra 2024. godine.